

0.0.1 mahāpadānasuttam

64. atha kho bhikkhave, vipassissa bodhisattassa vā-sūpagatassa rahogatassa paṭisallīnassa evaṃ cetaso parivitaṅko udapādi: "kicchaṃ vatāyaṃ loko āpanno, jāyati ca jīyati miyati ca cavati ca upapajjati ca. atha ca paṇimassa dukkhassa nissaraṇaṃ nappajānāti jarāmarāṇassa. kudassu nāma imassa dukkhassa nissaraṇaṃ paññāyissati jarāmarāṇassā?ti.

65. atha kho bhikkhave, vipassissa bodhisattassa etadahosi: "kimhi nu kho sati jarāmarāṇaṃ hoti, kimpaccayā jarāmarāṇa'nti. atha kho bhikkhave, vipassissa bodhisattassa yonisomanasikārā ahu paññāya abhisamayo "jātiyā kho sati jarāmarāṇaṃ hoti, jātipaccayā jarāmarāṇa"nti.

66. atha kho bhikkhave, vipassissa bodhisattassa etadahosi: "kimhi nu kho sati jāti hoti kimpaccayā jāti"ti. atha kho bhikkhave, vipassissa bodhisattassa yonisomanasikārā ahu paññāya abhisamayo: "bhave kho sati jāti hoti, bhava paccayā jāti"ti.

67. atha kho bhikkhave, vipassissa bodhisattassa etadahosi: "kimhi nu kho sati bhavo hoti kimpaccayā bhavo"ti. atha kho bhikkhave, vipassissa bodhisattassa yonisomanasikārā ahu paññāya abhisamayo: "upādāne kho sati bhavo hoti, upādānapaccayā bhavo"ti.

68. atha kho bhikkhave, vipassissa bodhisattassa eta-dahosi: "kimhi nu kho sati upādānaṃ hoti kimpaccayā upādānanti. " atha kho bhikkhave, vipassissa bodhisattassa yonisomanasikārā ahu paññāya abhisamayo: "taṇhāya kho sati upādānaṃ hoti, taṇhāpaccayā upādānanti. "

69. atha kho bhikkhave, vipassissa bodhisattassa eta-dahosi: "kimhi nu kho sati taṇhā hoti kimpaccayā taṇhā"ti. atha kho bhikkhave, vipassissa bodhisattassa yonisomanasikārā ahu paññāya abhisamayo: "vedanāya kho sati taṇhā hoti, vedanāpaccayā taṇhā"ti.

70. atha kho bhikkhave, vipassissa bodhisattassa eta-dahosi: "kimhi nu kho sati vedanā hoti, kimpaccayā vedanā"ti. atha kho bhikkhave, vipassissa bodhisattassa yonisomanasikārā ahu paññāya abhisamayo. "phasse kho sati vedanā hoti, phassapaccayā vedanā"ti.

71. atha kho bhikkhave, vipassissa bodhisattassa eta-dahosi: "kimhi nu kho sati phasso hoti, kimpaccayā phasso"ti. atha kho bhikkhave, vipassissa bodhisattassa yonisomanasikārā ahu paññāya abhisamayo: "saḷāyatane kho sati phasso hoti, saḷāyatanapaccayā phasso"ti.

72. atha kho bhikkhave, vipassissa bodhisattassa eta-dahosi: "kimhi nu kho sati saḷāyatanam hoti, kimpac-

cayā saḷāyatananti" atha kho bhikkhave, vipassissa bodhisattassa yonisomanasikārā ahu paññāya abhisamayo: "nāmarūpe kho sati saḷāyatanam hoti, nāmarūpapaccayā saḷāyatananti. "

73. atha kho bhikkhave, vipassissa bodhisattassa etadahosi: "kimhi nu kho sati nāmarūpam hoti, kimpaccayā nāmarūpanti" atha kho bhikkhave, vipassissa bodhisattassa yonisomanasikārā ahu paññāya abhisamayo: "viññāṇe kho sati nāmarūpam hoti, viññāṇapaccayā nāmarūpanti. "

74. atha kho bhikkhave, vipassissa bodhisattassa etadahosi: kimhi nu kho sati viññāṇam hoti, kimpaccayā viññāṇanti" atha kho bhikkhave, vipassissa bodhisattassa yonisomanasikārā ahu paññāya abhisamayo: "nāmarūpe kho sati viññāṇam hoti, nāmarūpapaccayā viññāṇanti. "

75. atha kho bhikkhave, vipassissa bodhisattassa etadahosi: "paccudāvattati kho idaṃ viññāṇam, nāmarūpamhā nāparam gacchati. ettāvatā jāyetha vā jīyetha vā cavetha vā upapajjetha vā, yadidaṃ nāmarūpapaccayā viññāṇam, viññāṇapaccayā nāmarūpam, nāmarūpapaccayā saḷāyatanam, saḷāyatanapaccayā phasso, phasapaccayā vedanā, vedanāpaccayā taṇhā, taṇhāpaccayā upādānam, upādānapaccayā bhavo, bhavapaccayā jāti, jātippaccayā jarāmaraṇam sokaparidevadukkhadomanassūpāyāsā sambhavanti. evametassa ke-

valassa dukkhakkhandhassa samudayo hotī"ti.

76. "samudayo, samudayo'ti kho bhikkhave, vipassissa bodhisattassa pubbe ananussutesu dhammesu cakkhum udapādi, ñāṇaṃ udapādi, paññā udapādi, vijjā udapādi, āloko udapādi.

77. atha kho bhikkhave, vipassissa bodhisattassa etadahosi: "kimhi nu kho sati jarāmaṇaṇaṃ na hoti, kissa nirodhā jarāmaṇanirodho"ti. atha kho bhikkhave, vipassissa bodhisattassa yonisomanasikārā ahu paññāya abhisamayo: "jātiyā kho asati jarāmaṇaṇaṃ na hoti, jāti nirodho jarāmaṇanirodho"ti.

78. atha kho bhikkhave, vipassissa bodhisattassa etadahosi: "kimhi nu kho asati jāti na hoti, kissa nirodhā jātinirodho"ti. atha kho bhikkhave, vipassissa bodhisattassa yonisomanasikārā ahu paññāya abhisamayo: "bhava kho asati jāti na hoti, bhavanirodhā jātinirodho"ti.

79. atha kho bhikkhave, vipassissa bodhisattassa etadahosi: "kimhi nu kho asati bhavo na hoti, kissa nirodhā bhavanirodho"ti. atha kho bhikkhave vipassissa bodhisattatassa yonisomanasikārā ahu paññāya abhisamayo: "upādāne kho asati bhavo na hoti, upādānanirodhā bhavanirodho"ti.

80. atha kho bhikkhave vipassissa bodhisattassa etadahosi: "kimhi nu kho asati upādānaṃ na hoti, kissa nirodhā upādānanirodho"ti. atha kho bhikkhave vipassissa bodhisattassa yonisomanasikārā ahu paññāya abhisamayo: taṇhāya kho asati upādānaṃ na hoti, taṇhānirodhā upādānanirodho"ti.

81. atha kho bhikkhave, vipassissa bodhisattassa etadahosi: "kimhi nu kho asati taṇhā na hoti, kissa nirodhā taṇhānirodho"ti. atha kho bhikkhatva vipassissa bodhisattassa yonisomanasikārā ahu paññāya abhisamayo: "vedanāya kho asati taṇhā na hoti, vedanānirodhā taṇhānirodho"ti.

82. atha kho bhikkhave, vipassissa bodhisattassa etadahosi: "kimhi nu kho asati vedanā na hoti, kissa nirodhā vedanānirodho"ti. atha kho bhikkhave vipassissa bodhisattassa yonisomanasikārā ahu paññāya abhisamayo: "phasso kho asati vedanā na hoti, phassanirodhā vedanānirodho"ti.

83. atha kho bhikkhave, vipassissa bodhisattassa etadahosi: "kimhi nu kho asati phasso na hoti, kissa nirodhā phassanirodho"ti. atha kho bhikkhave vipassissa bodhisattassa yonisomanasikārā ahu paññāya abhisamayo: "saḷāyatane kho asati phasso na hoti, saḷāyatana nirodhā phassanirodho"ti.

84. atha kho bhikkhave, vipassissa bodhisattassa etadahosi: "kimhi nu kho asati saḷāyatanaṃ na hoti, kissa nirodhā saḷāyatana nirodho?"ti. atha kho bhikkhave vipassissa bodhisattassa yonisomanasikārā ahu paññāya abhisamayo: "nāmarūpe kho asati saḷāyatanaṃ na hoti, nāmarūpanirodhā saḷāyatananirodho"ti.

85. atha kho bhikkhave, vipassissa bodhisattassa etadahosi: "kimhi nu kho asati nāmarūpaṃ na hoti, kissa nirodhā nāmarūpanirodho?"ti. atha kho bhikkhave vipassissa bodhisattassa yoniso manasikārā ahu paññāya abhisamayo: "viññāṇe kho asati nāmarūpaṃ na hoti, viññāṇanirodhā nāmarūpanirodho"ti.

86. atha kho bhikkhave, vipassissa bodhisattassa etadahosi: "kimhi nu kho asati viññāṇaṃ na hoti, kissa nirodhā viññāṇanirodho?"ti. atha kho bhikkhave vipassissa bodhisattassa yonisomanasikārā ahu paññāya abhisamayo: "nāmarūpe kho asati viññāṇaṃ na hoti. nāmarūpanirodhā viññāṇanirodho"ti.

87. atha kho bhikkhave, vipassissa bodhisattassa etadahosi: "adhigato kho myāyaṃ¹ maggo sambodhāya² yadidaṃ nāmarūpanirodhāya viññāṇanirodho' viññāṇanirodhā nāmarūpanirodho. nāmarūpanirodhā saḷāyatananirodho, saḷāyatananirodhā phassanirodho, phas-

bjt page 052

¹me ayaṃ vipassanāmaggo, pts.

²bodhāya, syā.

sanirodhā vedanānirodho, vedanānirodhā taṇhānirodho, taṇhānirodhā upādānanirodho, upādānanirodhā bhavanirodho, bhavanirodhā jātinirodho, jātinirodhā jarāmaraṇaṃ sokaparidevadukkhadomanassupāyāsā nirujjhanti. evametassa kevalassa dukkhakkhandhassa nirodho hotī"ti. "nirodho, nirodho"ti kho bhikkhave vipassissa bodhisattassa pubbe ananussutesu dhammesu cakkhuṃ udapādi, ñāṇaṃ udapādi, paññā udapādi, vijjā udapādi, āloko udapādi:

88. atha kho bhikkhave, vipassī bodhisatto aparena samayena pañcasūpādānakkhandhesu udayabbayānupassī vihāsi: "iti rūpaṃ, iti rūpassa samudayo, iti rūpassa atthaṅgamo. iti vedanā, iti vedanāya samudayo, iti vedanāya atthaṅgamo. iti saññā, iti saññāya samudayo, iti saññāya atthaṅgamo. iti saṅkhārā, iti saṅkhārānaṃ samudayo, iti saṅkhārānaṃ atthaṅgamo. iti viññāṇaṃ, iti viññāṇassa samudayo, iti viññāṇassa atthaṅgamo"ti. tassa pañcasu upādānakkhandhesu udayabbayānupassino viharato na cirasseva anupādāya āsavehi cittaṃ vimucci"ti.